

籌辦夷務始末

籌辦夷務始末卷之六

道光十九年己亥二月丁卯。兩廣總督鄧廷楨奏。竊臣會同廣東巡撫怡良遵

旨查辦鴉片。以為截流必應窮源。特議守堵之法。派飭該管水師各協營將備。調集師船。按月輪流。在於中路零丁各外洋。夷船寄碇處所。認真堵截查拏。期免漢奸接濟。並因近日以來。間有夾板夷船。藉稱被風。駛泊南澳洋面。現經中路設法堵截。恐其意在東趨。又經會籌水陸交嚴章程。飭行惠潮道府。並水陸各鎮。實力辦理。當經恭摺奏明在案。茲據南澳鎮總兵沈鎮邦稟稱。東路鎮轄各洋。本非夷船經

由之路向來隨到隨逐。並無停留。比因中路守堵。慕嚴先  
後有夷船八隻。駛來拋泊。當遵親督將弁舟師。逐去三船。  
餘仍遲延觀望。誠恐兵力單薄。不足以壯聲威。復調集澄  
海達濠師船。將該五船圍繞防範。並遣通事諭以如再逗  
留。定行開礮轟擊。各該船夷人。心生畏懼。即於十二月初  
六日。同時開行。齊向東南外洋駛去。跟蹤瞭望。杳無帆影。  
實已遠颺等情。臣伏查南澳洋面。向稱肅清。今忽駛泊夷  
船八隻之多。無論來自何處。其為意圖銷私無疑。苟非大  
加振作。則前者不去。後必續來。東路一隅。又將為狡兔之  
窟。該鎮沈鎮邦自奉檄以後。即能懾以兵威。全數驅逐出

境。辦理尚合機宜。惟各路現雖查辦嚴緊。而夷情叵測。其所裝運煙泥。斷不肯輕棄於地。必將恣為鬼蜮。求售其奸。而後已。當此稍為得手。益應奮勉圖功。庶奸販既絕。其勾通夷船。即無所希冀。前既廢然而返。後當不復再來。現在通事引水。經該鎮留於澳洋。師船亦未撤退。潮州鎮及該道府等。仍擇隘輪駐督拏。分飭破除畛域。遇船即驅。有犯即捕。務使速淨根株。毋留餘孽。

諭內閣。鄧廷楨奏。粵洋東路夷船。驅逐盡淨一摺。南澳洋面。本非夷船經由之路。近因中路零丁各外洋。夷船寄碇之處。守堵甚嚴。先後有夷船八隻。駛來拋泊。現經該鎮總兵。親督將弁舟師。

逐去三隻。餘仍遷延觀望。復經調集師船。將該五船圍統防範。並諭以如再逗留。定行開礮轟擊。各該船已向東南外洋駛去。辦理尚合機宜。惟念夷情叵測。顯因中路巡防嚴密。改向東路駛行。其為意圖銷私。已可概見。仍著該督等督飭該鎮道府等。各於要隘處所。輪班堵拏。遇船即驅。有犯即捕。務使根株淨盡。斷不准稍留餘孽。致遂其此拏彼竄之私。至該夷匪等趨利若鶩。現在裝運煙泥。又何肯因查拏緊急。甘心拋棄。勢必逞其鬼蜮伎倆。如各海口防範稍疏。即行駛往銷售。著沿海各直省督撫等。通飭所屬文武。務當不分畛域。協力同心。認真防緝。遇有該夷船拋泊該處海口。即行隨到隨逐。勿令片刻停留。庶奸販

既絕其勾通。夷匪亦無所希冀。

壬午。兩廣總督鄧廷楨廣東巡撫怡良奏。竊臣鄧廷楨於道光十六年三月。與升任廣東撫臣祁項水師提臣關天培。遵

旨會議海口操練章程。並防夷經費事宜。奏奉

上諭。所議俱妥。要在實力行之。切勿日久生懈等因。欽此。計臣鄧廷楨自十六年起。每歲秋操。親往虎門。會同提臣關天培認真校閱。均經奏報在案。查虎門為粵海中路咽喉。通商番舶絡繹。夷情叵測。良莠難分。有備無患。預謀為善。是以臣鄧廷楨。每與提臣涉海登山。周覽形勢。凡扼要處所。礮

臺星羅碁布。武備整肅精嚴。固已層節防閑。足資控制。第海面寬深。潮流湍急。若不豫籌阻截良方。似尚難言周密。因日夕籌思。擬於橫檔山前。海面較狹之處。創造粗大鐵鍊。安根兩岸。鐵鍊之下。承以木排。木排兩端。繫以鐵錨。梭纜有事即橫截中流。無用則分陳海畔。如門開闔。無礙行船。惟事關創始。策畫宜周。隨於上年五月。函商提臣關天培。覆稱橫檔海面較狹。必須創造排鍊二道。中隔九十丈。分兩層安設。實得扼吭之勢。并應於威遠礮臺迤西。添建六十丈平面大礮臺一座。安放礮六十位。以壯聲威。緣該處海面為兩山所束。寬止三百餘丈。一遇順風長潮。夷

船。迅如奔馬。誠使之來路多防。去途易梗。則其膽先落。有計安施。況貿易夷船。內泊黃埔。私弊叢生。果能設此重關。不獨堪禦外侮。兼可懾服內奸。思慮預防。一舉兩得等語。臣等即札飭司道。將議設排鍊等項。委員估辦去後。隨據逐加確估。所有創造木排鐵鍊二道。鐵錨梭纜二百七十副。大划船四隻。并鐵鍊兩岸安根。及看守排鍊兵房三十間。又添建大礮臺一座。面闊六十丈。并守臺兵房旗幟等項。又添鑄大礮六十位。連礮架礮罩。隨礮一切器具。共估需銀八萬六千兩。此項經費。先據洋行眾商伍紹榮等情願捐銀十萬兩。以供要需。當飭藩司兌收貯庫。咨會提



臣關天培在於虎門近地分設木廠鐵廠石廠纜廠連委副將李賢同知劉開域總司其事。派令直隸州知州余保純候補知縣張大緒守備王鵬年盧大鈺等隨時領項分頭購料監工。并經提臣就近指示規模遵照趕辦。至添建礮臺安礮六十位。需兵九十名。應於通省水師各營酌撥槍礮步兵三十名。陸路各營酌撥槍礮守兵六十名。在臺防守掌放。仍擬抽撥永靖營千總一員。并於水師提標中營步兵內添撥額外二員。以資管領而專責成。其專管排鍊應添設把總二員。兵丁一百二十名。先期操練精熟。每歲於五月半前整備安排。霜降節後撤排歸塢。重關既設。

臨事仍加派兵船火船停泊上流外夷雖極冥頑諒不肯自投陷阱。即犬羊之性。恐不畏死。有如十四年夷目嘩嘩。及上年嗎咄噲妄圖進口情事。我則以逸待勞。迨其闖入穀中。欲進則排鍊羈絆。思退則風水不容。而各臺大礮連環轟擊。火船下壓。兵船繼之。夷船縱堅如鐵石。要亦頓成灰燼。加以堅持罔懈。歷久不渝。邊釁定可潛消。海疆堪期永固。此臣等與提臣關天培相機籌度。議增排鍊礮臺之原委也。上年十月。已准提臣關天培委員將先業成木排鍊成鐵鍊各數具。運赴省河。經臣等率同司道逐一閱驗。木排紮筏堅固。鐵鍊鍛淬精純。據該委員稟稱。新建礮

臺石料。現已運到六成。臺根積土。亦經起除淨盡。底石已砌三層等語。覈與提臣咨會相符。因飭催原派文武各員弁。務於本年三月內。將排鍊礮臺一律趕造齊全。其新鑄礮位。業已購覓妥匠。講求火候。現在春融。即可如法製造。排鍊兵丁。經提臣關天培。飭屬招募善泅水者。一百二十名。演習啟閉。以期臨時得力。再此項工程。係洋商捐辦。請免報銷。又排鍊等項。逐年修費。添設排鍊官兵月餉。並排鍊礮臺各兵丁。六七八九四箇月。增給口糧。春秋二操軍火賞號。約共歲需銀八千三百餘兩。查商捐銀十萬兩內。除動支防範夷目嗎咤哈經費銀一萬二百三十八兩零。

此項工程八萬六千兩外。僅存銀三千七百六十餘兩。尚不敷一歲之需。容臣等另行籌款奏辦。

諭軍機大臣等。據鄧廷楨等奏籌議虎門海口。創造木排鐵鍊。並添置礮臺礮位。分別繪圖貼說。開單呈覽一摺。虎門海口。為粵海中路咽喉。通商番舶。絡繹往來。現在籌議海口章程。自應妥為布置。以密巡防。據該督等奏稱涉海登山。周覽形勢。請於橫檔山前海面較狹之處。創設鐵鍊木排。並於威遠礮臺迤西。添建大礮臺一座。安放礮六十位。以壯聲威。所有估需各項銀八萬六千兩。既係洋商伍紹榮等情願捐辦。著免其造冊報銷。該督等即飭催原派文武各員。務於本年三月內。將排鍊礮臺。

一律趕造完竣。並將新添礮位。如法製造。其泅水兵丁。由該提督關天培。如數飭募。隨時演習。以期得力。至排鍊等項。每年修費。及添設排鍊官兵月餉。並排鍊礮臺各兵丁四箇月增給口糧。春秋二操軍火賞號。共歲需銀八千三百餘兩。除商捐存銀三千七百六十餘兩外。尚不敷一歲之需。著該督等另行籌款。奏明辦理。餘依議。

又

諭。據鄧廷楨等奏。籌議虎門海口。創造木排鐵鍊。添置礮臺礮位一摺。已降旨允准。虎門海口。為粵海中路咽喉。現當籌議海口章程。自宜妥為布置。以密巡防。該督等所請於海面安設木排

鐵鍊。以羈絆夷船。並添設礮臺。添製礮位之處。是否有益。著林則徐詳細查察情形。據實具奏。原摺著鈔給閱看。

鄧廷楨又奏竊。臣前以鴉片煙土。販自外夷。躉船。必清其源。然後其流可絕。是以嚴拏窯口煙館。并販賣吸食匪徒。外。仍籌議輪派水師將備。按月駐洋守堵之法。調集舟師。在於躉船拋泊之零丁各洋面。聯幫堵截查捕。無論內地。何項船隻。毋許攏近躉船。以冀斷其銷售接濟之路。庶奸夷無利可圖。或當廢然思返。一面繕譯檄文。刊成諭帖。散給各國夷人。曉以利害禍福。飭將躉船盡數遣還。各安貿易正業。并促令住省年久之港脚夷。噎噸。於上年十二月

附船回國。均經具奏在案。查駐洋守堵。以去臘為第一月。經臣檄飭輪派之將備。將堵截情形。及躉船作何動靜。五日稟報一次。以憑覈辦。本年正月。輪值香山協副將惠昌。耀管帶備弁舟師赴堵。茲據該副將暨署澳門同知蔣立昂。先後稟稱。零丁各洋。分泊躉船處所。因堵拏嚴緊。並無民船在彼遊奕窺伺。躉船內有港腳嘍船。及嘍吐船。各一隻。於上年十二月二十八日午刻。由雞頸洋面。一同起碇。向老萬山外夷洋。張帆駛去。實已遠颺。其尖沙背洋面。查尚泊船十六隻。零丁九洲三角潭仔等洋。共泊船六隻。綜計尚有二十二隻。內港腳嘍船一隻。亦經整理桅帆。似

有開行之意。現在乘機堵逐。不敢鬆勁等情。并准水師提督臣關天培。粵海關監督臣豫堃。查明咨會無異。伏查粵洋躉船。經臣前於十七年八月。驅去崎嶇國叨嘮咀船一隻。尚存二十四隻。是年奏辦躉船摺內。業已據實聲明。今於該夷喧嘩回國之後。又復駛去二船。且有整帆欲遁者。雖夷情叵測。難保存者不無觀望。去者希冀復來。而大局實已驚動。當此辦理。差為得手之時。其機斷不可失。亟應妥速防維。且諭且逐。絕其徘徊之念。堅其悔禍之心。使得銜尾開行。肅清洋面。以冀仰副

聖主綏靖海疆。肅除錮弊之至意。



諭軍機大臣等。據鄧廷楨奏。外洋鴉片躉船。屢經派員堵截驅逐。內有港腳躉船。又嘔吐船。各一隻。於上年十二月起碇駛去。業已遠颺。其尖沙嘴等處洋面。現尚泊船二十二隻。內港腳地噸船一隻。亦經整理桅帆。似有開行之意等語。此次諭逐夷船。既有可乘之機。著該督務即妥速防維。一力整頓。使現泊各船。銜尾開行。毋任稍有觀望。總期洋面肅清。奸宄絕跡。以副委任。

丙戌。

欽差大臣湖廣總督林則徐奏。竊臣上年冬間進京。

陛見。於十一月十五日。欽奉。

諭旨。著頒給欽差大臣關防。馳驛前往廣東。查辦海口事件。所有。

該省水師兼歸節制等因。欽此。臣當即在京請

訓。晏聆

恩諭。備極周詳。蒙

委任之逾恆。彌深感奮。念責成之重大。倍切悚惶。

陛辭後。於二十三日出京。經由直隸山東安徽。皆無停滯。惟江西

途次。連遇大雪。間有未能趨行之處。旋即加緊前進。以速

補遲。茲於正月二十五日。行抵廣東省城。與督臣鄧廷楨。

撫臣怡良等會晤。當據告知節次拏獲鴉片煙販。水陸交

嚴。羣情頗為警動。迨聞

特派查辦之

旨。聲威所被。震懾民夷。是以駐省年久之夷商。噶喇於十二月十二日。請牌下澳。附搭港脚映船回國。其零丁洋躉船內有港脚噶船及嘮吐船二隻。亦於十二月二十八日回去。今年正月二十日。又有港脚噶船及吡喇等船。咪喇噶國喇。噶暗及吐喇等船。噶國喇吐船。小呂宋船。共十四隻。起碇開行。二十一日。又有港脚噶船等船。咪喇噶國喇。等船。共四隻。與前船一同駛去。旋據探報。拋泊了洲洋面。該處為夷船回國必經之路。現仍嚴行探逐。業經先後具奏等語。臣復細加查訪。均屬相符。惟思夷情詭譎異常。現有鴉片在船。未必遽甘回國。果否計窮思逸。抑係擇地圖遠。均

未可定。第既經開動。其為畏憚可知。急應宣示。

天威乘勢盡行驅逐。以為清源之計。除飭外海水師。確查飛稟。相機會辦外。至臣先於途次。承准軍機大臣字寄。上年十二月十六日奉

上諭。本日據鄧廷楨奏。籌調師船將備。聯幫駐泊洋面。堵截民夷。售私一摺。著林則徐馳抵廣東後。即將各該處情形。悉心體察。所有摺內所議。駐洋守堵各事宜。會同鄧廷楨通計熟籌。務臻妥善。覈實辦理等因。欽此。臣查閱摺內所議。分派兵哨各船。在零丁洋一帶。按月輪流堵截。無論內地何項船隻。駛近夷船。概行追擊。儻敢違抗。拒捕。格殺勿論。其東路惠潮等屬

洋面口岸一體巡防。似此密布星羅已足以昭嚴密。惟現在夷薨既經移動。自須到處跟蹤。即使該薨船駛出老萬山。猶恐內海匪船潛赴外洋勾結。是杜絕僥私之竅。實屬刻不容鬆。臣甫經到省。於各處島澳口門尚未親歷。現在檢閱圖志。先與督撫臣在省互相講求。擬於旬日之間。出赴中路之虎門澳門等處。與水師提臣關天培乘船周覽。以便相機度勢。通計熟籌。俟薨船驅除應手之後。再往東路。察看機宜。隨時會同鄧廷楨等覈實辦理。總期拔本塞源。力迴錮習。以仰副

聖主澄清海澨。綏戢生民之至意。

諭軍機大臣等。林則徐奏體察洋面堵截情形一摺。廣東海口。為各夷船出入經由要道。自應水陸交嚴。以除銅弊。茲據奏稱現在夷薨既經移動。自須到處跟蹤。即使該薨船駛出老萬山。猶恐內海匪船。前赴外洋勾結等語。著林則徐即親赴虎門澳門等處。相機度勢。通計熟籌。務使外海夷船。不得駛進口門。妄生覬覦。內地匪船。不敢潛赴外洋。私行勾結。嚴密巡防。盡除銅弊。方為妥善。俟中路辦竣。再往東路察看機宜。覈實辦理。該大臣係特簡前往查辦大員。務須悉心籌議。從容辦理。不必急於蒞事。要期除惡淨盡。方為不負委任。

三月乙卯。

欽差大臣兩江總督林則徐兩廣總督鄧廷楨廣東巡撫怡良奏  
竊照鴉片來自外洋毒流中國蔓延既久幾於莫可挽迴  
幸蒙我

皇上渙號大宣

乾綱獨斷力除銅弊法在必行且荷

特頒欽差大臣關防派臣林則徐來粵查辦仰賴

諭旨嚴明

德威震疊不獨禁令行於內地且使風聲播及重洋復蒙

諭令臣鄧廷楨等益矢奮勤盡泯畛域下懷欽感倍思併力驅除

在臣林則徐未到之先已將窯口煙館興販吸食各犯拿

獲數百起。分別懲辦。又派令各師船輪流守堵。水陸交嚴。並將東路夷船。及住省奸夷。先後驅逐。節經奏蒙

聖鑒。臣林則徐於正月二十五日到省。亦將籌辦大概情形。先行具奏在案。維時在洋薨船二十二隻。已陸續起碇開行。作為欲歸之勢。若但以逐回夷界為了事。原屬不難。惟臣等密計熟商。竊以此次

特遣查辦。務在永杜來源。不敢僅顧目前。因循塞責。查夷情本皆詭譎。而販賣鴉片者。更為奸猾之尤。此次聞有

欽差到省。料知必將該夷薨船。發令驅逐。故特先行開動。雖却向來所泊之零丁等洋。以明其不敢違抗。其實每船內貯存



鴉片。聞俱不下千箱。因上年以來。各海口處處嚴防。難於發賣。而其奸謀詭計。仍思乘間覓售。非特不肯拋棄大洋。亦必不肯帶回本國。即使逐出老萬山以外。不過暫避一時。而不久復來。終非了局。且內海匪船。亦難保不潛赴外洋。勾結售買。必須將其躉船鴉片。銷除盡淨。乃為杜絕病源。但洪濤巨浪之中。未能確有把握。因思躉船之存貯。雖在大洋。而販賣之奸夷。多在省館。雖不必遽繩以法。要不可不喻以理。而休以威。臣林則徐當譯諭帖。責令眾夷人將躉船所有煙土。盡行繳官。許以奏懇。

大皇帝天恩。免治既往之罪。並酌請。

賞犒以獎其悔懼之心。嗣後不許再將鴉片帶來內地。犯者照

天朝新例治罪。貨物沒官等語。與臣鄧廷楨。怡良酌商定稿。即於二月初四日。公同坐堂。傳訊洋商。將諭帖發給。令其齎赴夷館。帶同通事。以夷語解譯曉諭。立限稟覆。一面密派兵役。暗設防維。查各國賣買。以暎咭喇為較大。該國自公。司散局以後。於道光十六年。派有四等職夷人義律。到澳門。經管商榷。謂之領事。臣等發諭之後。各國則皆觀望於暎夷。而暎夷又皆推諉於義律。其中有通曉漢語之夷人。噶等四名。經司道暨廣州府等。傳至公所。面加曉諭。因該夷噶等回稟之言。尚為恭順。當即賞給紅綢二疋。黃酒二

壞著令開導東夷速繳鴉片。未據即行稟覆。至二月初十日。義律由澳門進省。其時奸夷嘖咤等。希圖乘夜脫逃。經臣等查知截回。諭責義律以不能約束之非。並照歷居夷人違抗即行封艙之案。移咨粵海關監督臣豫堃將各夷住泊黃埔之貨船。暫行封艙。停其貿易。又夷館之買辦工人。每為夷人潛通信息。亦令暫行撤退。並將前派暗防之兵役酌量加添。凡遠近要隘之區。俱令明為防守。不許夷人出入往來。仍密諭弁兵不得輕舉肇釁。在臣等以靜制動。意在不惡而嚴。而諸夷懷

威均已不寒而慄。自嚴密防守之後。省城夷館。與黃埔澳門及洋面。躉船。信息絕不相通。該夷等疑慮驚惶。自言愧悔。臣林則徐又復疊加示諭。勸戒兼施。即於二月十三日。據該領事義律稟覆。情願呈繳鴉片。維時距撤退買辦之期。業已五日。夷館食物。漸形窘乏。臣等當即賞給牲畜等物。二百數十件。復向查取鴉片確數。經義律向各夷人名下。反覆追究。旋據呈明。共有二萬二百八十三箱。查向來等獲鴉片。如係外夷原箱。每一箱計裝整土四十箇。每箇約重三斤。每箱應重一百二十斤。即至日久收乾。每箱亦約在百斤以外。以現在報繳箱數覈之。總不下二百數十萬斤。若

經奸販轉售。則流毒何所不至。今設法令其全繳。不動兵刑。無非仰仗

天威。自然畏服。當即諭令駛赴虎門。以憑收繳。除商明留臣怡良在省彈壓防範外。臣林則徐。臣鄧廷楨。均於二十八日同抵虎門。水師提督臣關天培。本在虎門駐劄。凡防範夷船。查拏售私之事。皆先與臣等隨時商榷。務合機宜。自收繳之諭既頒。尤資嚴密防堵。茲躉船二十二隻。陸續駛至虎門口外。關天培當即督率將領。分帶提標各營兵船。排列彈壓。並先期調到碣石鎮總兵黃貴。署陽江鎮總兵楊登俊。各帶該標兵船。分排口門內外。聲威極壯。粵海關監督

臣豫檠亦駐虎門稅口。照料稽查。臣等親率候補知府南  
雄直隸州知州余保純署廣州府同知佛岡同知劉開域  
候補通判李敦業樂昌縣知縣吳思樹暨副將李賢守備  
盧大鈺分派文武大小委員隨收隨驗。隨運隨貯。惟為數  
甚多。一躉船所載之箱。即須數十隻剝船。始敷盤運。而自  
口外運至口內。堆貯之處。又隔數十里。若日期過促。草率  
收繳。恐又別滋弊端。臣鄧廷楨擬收至兩三日後。先回省  
署辦公。臣林則徐自當常駐海口。會同提臣關天培詳細  
驗收。經理一切。容俟收繳完竣。查明實在箱數。與該夷領  
事所稟。有無參差。再行恭摺奏報。並取其各夷人永不夾

帶切結存案。以斷根株。伏思夷人販賣鴉片多年。本干天朝法紀。若照名例所載。化外有犯。並依律科斷之語。即予以正法。亦屬罪所應得。惟念從前該夷遠隔重洋。未及遽知嚴禁。今既遵諭全繳。即與自首無異。合無仰求

皇上覆載寬宏。

恩施法外。免追既往。嚴儆將來。並求

俯念各夷人鴉片起空。無貲買貨。酌量

加恩賞給茶葉。凡夷人名下繳出鴉片一箱者。酌賞茶葉五斤。以

獎其恭順畏法之心。而堅其改悔自新之念。如蒙

恩准。所需茶葉十餘萬斤。應由臣等捐辦。不敢開銷。至夷人呈繳

鴉片如此之多。事屬創見。自應派委文武大員。將原箱解京驗明。再行燒燬。以徵實在。

諭內閣。本日據林則徐等由驛馳奏。查辦躉船。盡數呈繳煙土一摺。所辦可嘉之至。躉船私販煙土。希圖脫逃。經林則徐等截回躉船二十二隻。起獲煙土二萬二百八十三箱。該夷等畏法自首。情尚可原。著免其治罪。該督等奏請酌賞茶葉之處。著照所議辦理。至此項煙土。為數甚多。俟收繳完竣。即查明實在箱數。派委明幹員弁解京。以憑覈驗。林則徐等查辦妥協。自應量加獎勵。林則徐。鄧廷楨。著交部從優議敘。怡良。豫。等。著交部議敘。



林則徐等又奏。臣等先後承准軍機大臣字寄。道光十九年正月初九日奉

上諭。本日據鄧廷楨怡良片奏。查辦粵省鴉片煙情形。林則徐計應早晚到粵。該督等仍遵前旨。協力同心。盡泯畛域。勉之又勉。以副委任。至林則徐前此面奏。請頒發檄諭。曉示外夷。著與鄧廷楨酌商。是否可行。儻必須頒發。著即妥議底稿具奏。經朕披覽。再行檄發等因。欽此。又正月二十七日奉

上諭。據鄧廷楨等奏。通諭各國夷商。消除舊污。並繕錄諭稿進呈。現在外洋拋泊各躉船。是否盡數回國。其並非躉船。又非進口貨船。往來各洋寄碇者。能否絕跡。著林則徐會同該督等。嚴飭

水師各鎮協營調集師船在各洋面聯幫追捕。毋任再有偷漏其窩口煙館各犯並著通飭各屬挖淨盡以絕根株。其茶葉大黃果否為該夷所必需。僅欲斷絕。是否堪以禁止。不至偷越之處。並著悉心訪察。據實具奏等因。欽此。查外洋拋泊躉船已據遵諭呈繳煙土。現經臣等恭摺具奏。其並非躉船。又非進口貨船。往來各洋寄碇者。以東路南澳鎮屬洋面為較多。先經臣鄧廷楨檄飭該鎮會同潮州道府設法防堵。業將停泊夾板夷船八隻驅逐開行。於上年十二月二十七日奏明在案。今春以來復據該鎮先後稟報。偶有夷船駛至長山尾大金門等洋遊奕。亦經實力驅逐。駛出夷洋。此

等夷船聞知煙土盡數繳官。無所希冀。似可不致再來。臣等仍檄飭該鎮。聯幫堵截。以絕覬覦。並飭潮州道府。嚴查海口。以杜偷漏。期於一律肅清。其內地窯口煙館各犯。除照舊嚴密查拏外。現在民間畏懼改悔。多有願將舊存煙土煙具。赴官呈繳者。當於省城分設官局。派員驗收。並經本省紳士。隨處設局。分投勸諭。旬餘以來。陸續呈繳。甚為踴躍。至茶葉大黃兩項。臣等悉心訪察。實為外夷所必需。且夷商購買出洋。分售各路島夷。獲利尤厚。果能悉行斷絕。固可制死命而收利權。惟現在各國夷商。業經遵諭呈繳煙土。自應仰乞

天恩准其照常互市。以示懷柔。所有斷絕茶葉大黃。似可暫緩置議。如該夷經此次查辦之後。仍敢故智復萌。希圖夾帶鴉片入口。彼時自當嚴行禁斷。並設法嚴查偷越弊端。應請於善後章程內。另行籌議具奏。至臣林則徐面奏。請頒外夷檄諭一節。原擬抵粵後。與臣鄧廷楨悉心商酌。如須頒發。自應先擬底稿進呈。恭候

訓示。嗣思暎咭喇國。既有在粵之領事義律。及住省夷人。不如就近諭知。飭將鴉片悉數繳官。躉船迅速回國。現已辦理應手。則檄諭該國之處。似可暫緩頒行。俟將來奉到部頒罪名新例。暨議定善後章程。一併彙同備文照會。仍遵節次

諭旨。妥擬底稿。恭呈。

御覽。再行頒發。

諭軍機大臣等。林則徐等覆奏堵截粵洋夷船情形。請暫緩議斷互市。及頒行各國檄諭等語。所見是。此次查辦海口。防堵薨船。各國夷商。業經遵繳煙土。自應加恩。准予照常互市。以示懷柔。所有斷絕茶葉大黃。著暫緩置議。其啖咭喇既有在粵領事。及住省夷人。經該大臣等。就近諭知。辦理應手。所有檄諭該國之處。亦著暫緩頒行。就俟議定興販吸食各罪名。頒行新例時。於善後章程內。另行詳細籌議。仍遵前旨。擬稿進呈。再行頒發。

辛酉。浙江道監察御史鄧瀛奏。竊惟鴉片之害。蔓延直省。

今

皇威遠震。夷人畏罪自首。將所攜煙土盡數呈繳。至二萬二百八十三箱之多。大害迅除。臣民慶幸。其所獲煙土。據該大臣等奏請解京覈驗。奉

旨允准。蓋因為數甚多。向所未聞。恐中外未能深信。自應全數解京。俾薄海臣民共觀情形。警目洗心。革除錮習。第其中亦有繁累滋弊之處。不可不為慮及。蓋廣東距京程途遼遠。過剝甚多。廣東江西安徽陸路多用擡夫。每箱用夫二人。計須四萬餘人。廣東江西水路須用船隻。其船稍大者。不過裝百餘箱。計須封雇民船百餘號。用水手一二十人。安

徽以北。俱用車載。每車裝十餘箱。計須大車千餘輛。用民夫千餘人。騾馬五六千頭。即由江西水路。徑向長江。轉入運河行走。亦抵運解銅鉛船數起之多。此項舟車民夫。誠恐沿途地方。一時驟難雇備。即分數起押解。可無短絀。而經費之多。終不能減。若令官民籌辦供應。不免賠累勞擾。若盡報部覈銷。則不值以

國家有用之財。糜之於無用之物。又此物最易偷換。近來各省多有假造煙土。其價僅值洋土十分之一。而形色逼真。雖積慣吸食者。莫能辨別。雖在彼起解。到京覈驗。皆有大員監視。而長途遲滯。日經民夫千萬人之手。委官數人耳。

目安能周防。即到京後。

欽派大臣查驗。亦祇能覈其多寡。無由辨其真偽。弊竇之生。何所不至。且林則徐鄧廷楨。怡良。豫。鄂。關。天。培。皆係

皇上委任責成之人。當不敢扶同欺飾。自取罪戾。可否

敕令該大臣將起獲煙土。毋庸解京。收繳完竣。即在該處督率員弁。公同查覈。目擊銷燬。以省解運之煩。而早除一日。即可免一日之患。且使沿海居民。及夷人等。眼見銷燬情形。咸曉然於

聖天子除惡務盡之至意。益當震懾畏服。不敢復萌故智矣。

壬戌



諭內閣。前據林則徐等馳奏。變船鴉片。盡數呈繳。請解京驗明燒燬。當降旨允行。本日據御史鄧瀛奏稱。廣東距京程途遼遠。所繳煙土。為數較多。恐委員稽查難周。易啟偷漏。抽換之弊等語。林則徐等經朕委任。此次查辦粵洋煙土。甚屬認真。朕斷不疑其稍有欺飾。且長途轉運。不無借資民力。著毋庸解送來京。即交林則徐。鄧廷楨。怡良。於收繳完竣後。即在該處。督率文武員弁。公同查數。目擊銷燬。俾沿海居民。及在粵夷人。共見共聞。咸知震鑒。該大臣等惟當仰體朕意。覈實稽查。斷不准在事員弁人等。稍滋弊混。

甲子。掌河南道御史步際桐奏。竊思鴉片流毒日久。去年

蒙

皇上特派督臣林則徐赴粵查辦。務期杜絕病源。該督於到粵後四十日內。即將夷船煙箱盡數起出。想見查辦認真。不負簡任。惟臣讀該督摺奏中有云。取具各夷人永不夾帶切結存案。以斷根株等語。則是於煙箱盡繳之後。所以為將來計者。恃此切結。竊以為切結之具。祇可斷其移泊近洋。不能禁其復停大海。蓋移泊近洋。我可據其所具切結。詰之以辭。繩之以法。若大海空曠之中。則理論之有所不聞。勢劫之有所不便。向來切結。尚復成何把握。況夷人惟利是圖。反覆性成。其為計於今日者。方幸夫出結之後。可以脫然引

去。雖責以萬分切實之結。亦將甘心出具。迨既歸而裝煙復來。乃為遙停大海之計。以待漢奸之自行運取。是在彼不過以一二人暗送消息。而漢奸之隄防法網者。又誰肯表暴其蹤跡。即欲向省館中夷人責問。亦未必遽得端倪。善立法者。使諸弊處不得不破之勢。若因其事不顯聞。遂以為永斷根株。徒令接辦之人。開一含混之路。甚非我皇上為時除害。拔本塞源之至意矣。相應請

旨。敕下該督臣林則徐。妥為籌畫。於取其各夷人。永不夾帶切結之外。再為設法。以杜日久漸生之弊。庶幾慮周事外。此害可以永除。

乙丑。

諭軍機大臣等。御史步際桐奏。查辦夷船鴉片。取具切結。不足永斷根株等語。夷船販運煙土。經此次盡數呈繳以後。自應妥籌善法。杜其復來。若但以切結為憑。仍屬有名無實。且夷船停泊大海。難保無暗遞消息。漢奸前往運取等弊。著林則徐。鄧廷楨。悉心籌畫。務使弊源盡絕。永杜含混之端。方為不負委任。原摺著鈔給閱看。

四月。庚辰。

欽差大臣兩江總督林則徐。兩廣總督鄧廷楨。廣東水師提督關天培。奏。臣林則徐抵粵以後。與臣鄧廷楨。暨撫臣怡良。公

同商酌。責令夷人將躉船煙土悉數呈繳。旋據啖咭喇國領事義律稟明。願將各船鴉片二萬二百八十三箱陸續駛至虎門呈繳。臣林則徐、臣鄧廷楨即於二月二十八日駛抵虎門。會同臣關天培督率收繳。業於二月二十九日恭摺馳奏在案。惟收繳煙土須將剝船攏近躉船方能盤運。而剝船與躉船高下懸殊。登降已形費力。迨起至一半之後。躉船水跡浮高。須防風浪又必下石壓艙。且潮汐時有往來。風信兼多順逆。一遇風潮相薄。剝船不能駛傍夷船。即勉強攏近。而兩相撞擊。損壞堪虞。不得不暫為停止。時當三月。風暴正多。竟不免有終日坐守之事。臣等同駐

海口。時刻督催。得起即起。不任延緩。茲自二月二十九日  
收起。截至三月二十日。計已收繳鴉片一萬五千八百八  
十九箱。又一千五百四十七口袋。覈之義律原報數目。已  
逾十分之八。惟近數日來。察看後船煙土。較諸在先收繳  
之船。所載漸少。雖一時未即收完。而覈計大數。恐其或有  
短欠。當又派員持諭。前赴省城夷樓。向領事義律。嚴加詰  
責。即據稟覆。伊所報數目。係在省樓覈算帳據。而各船裝  
載鴉片。間有駛往沿海地方。如潮州南澳等處者。遠職再  
行催回。不論現泊何方。半月內想可催到。定必如數盡繳  
等語。察其情詞。似非虛誑。當即准限半月。責令迅速往催。

臣等伏思東路南澳地方。屢有夷船駛至。自上年驅逐淨盡之後。今春仍間有數船。至長山尾等洋游奕。雖經該鎮隨時驅逐。而夷船旋去旋來。是否中路分銷。抑係外洋另股。悉心訪察。冀得端倪。惟夷人既不肯輸情。衆口亦茫無確據。正思中路呈繳事竣。再行查辦南澳一隅。以冀斷絕根株。今義律於無心中自行吐露。是中東兩路實屬一氣相生。其躉船雖在零丁等洋。而三板等船。分載煙土。由外洋駛往南澳。覓售。誠為事所必有。既經逐層澈究。正當乘此機關。責成該領事。將分往南澳各船。一概招回。悉數呈繳。不但原報二萬餘箱之內。不准短少一箱。如此外尚有

多餘。亦必儘數收繳。期於一律淨盡。

林則徐又奏。承准軍機大臣字寄。道光十九年正月二十七日。奉

上諭。本日據鄧廷楨怡良奏。稱。偷逐港脚夷商。噶噸。現在下澳。附船回國等語。該夷盤踞既久。黨羽必多。現在各隻船尚未回帆。其所存煙泥。豈肯即行拋棄。難保不別肆詭謀。著林則徐嚴密訪查。該夷噶噸是否實已下澳開行。約於何日起碇。如尚在逗留。即著嚴行驅逐。據實覆奏等因。欽此。臣查該夷噶噸於上年十二月請牌下澳。附船回國。業經臣於奏報到粵。摺內聲敘在案。茲復欽奉



諭旨。著臣嚴密訪查。當即欽遵。密咨粵海關監督臣豫堃。諭飭洋商伍紹榮等。確切查稟。並札澳門同知。轉諭在澳之西洋夷目。唆唆。查明喳噸實係何日自省到澳。附搭何船。於何日由澳開行回國。據實稟覆。一面暗遣妥人。改裝前赴澳門。密加察訪去後。茲准豫堃咨。據署澳門同知蔣立昂轉據唆唆。稟覆。喳噸於上年十二月十三日。由省到澳。即於十六日由澳附搭港脚映船。開行回國。又據洋商伍紹榮等。稟同前情。與臣遣人赴澳密查。均屬相符。是喳噸實已於上年十二月間。搭船回國。並未逗留。毫無疑義。惟該夷販賣鴉片。來粵多年。誠如

聖諭。盤踞既久。黨羽必多。所存煙泥。豈肯即行拋棄。臣先經訪得。現住省城義和行之映順。即係渣順之弟。又映呀咄咄。三呀咄。皆渣順之外甥。並有代伊管帳之呀咄。信亦在該行居住。是該夷雖去。而買賣帳目。仍有人代為經理。此次義律稟繳鴉片。雖係籠統開報。並未分析某夷名下若干。而躉船船戶。僉稱渣順居其大股。是該夷存積之煙。不致另有囤貯。臣與督臣鄧廷楨面商。渣順既已逃回。務當使之永不敢來。方為善策。此時煙土雖已收繳。其夥黨亦必驅除。如映順。映呀咄。三呀咄。信之類。現皆給諭洋商。令與向賣鴉片著名之夷人順咄等。一併驅逐回國。

庶可杜絕奸夷蹤跡。免致勾結盤踞。復貽地方之害。

諭軍機大臣等。本日據林則徐等奏。收繳夷船鴉片。乘勢清理東路等語。粵洋躉船。存貯鴉片二萬二百八十三箱。前經林則徐等。諭令駛至虎門陸續呈繳。茲據奏稱。剝船與躉船高下懸殊。煙土起至一半。躉船水跡浮高。風信靡定。不免終日坐守。現在所繳鴉片。數之原報數目。已逾十分之八。又稱東路南澳地方。間有數船至長山尾等洋遊奕。雖經該鎮隨時驅逐。而旋去旋來。是中東兩路。實屬一氣相生。其三板等船。分載煙土。駛往南澳。亦不可不乘此機。一概招回。悉數呈繳。著林則徐等。悉心籌畫。相機妥辦。不但原報二萬餘箱之內。不准稍有短少。如此

外尚有多餘。亦應儘數收繳。總期一律淨盡。毋留餘孽。又另片奏查明噎噸實已回國。而現住省城義和行之映噸。即係噎噸之弟。又映呀吡噉。呀吡噉。皆噎噸之外甥。並有代伊管帳之呀吡噉。亦在該行居住等語。該夷盤踞既久。黨羽必多。若不儘數驅除。難保不死灰復燃。仍貽後患。著即將摺內所指各該夷等。與著名之噎吡等。一併驅逐。不准任意逗留。並嚴諭領事義律。夷目噎噉多等。確切查明。此外如有該夷夥黨。務即設法驅令回國。毋許再有隱匿。以除錮弊而絕詭謀。

甲午。

欽差大臣兩江總督林則徐。兩廣總督鄧廷楨。廣東水師提督關

天培奏。噶咭喇等國夷人。呈繳躉船鴉片。經臣等會摺馳奏。迨收逾十分之八。即乘勢清理東路。亦經續行奏明在案。臣等查粵省東路南澳一帶。係與福建漳州府屬洋面毗連。該處夷船。自上年驅逐開行之後。今春又據稟報。有數隻駛至長山尾等洋游奕。而福建之布袋等洋。近在其北。聞亦有夷船旋去旋來。緣兩省交界之間。逐於粵則竄於閩。逐於閩又竄於粵。無非因載有鴉片。隨處覓售。茲粵省中路躉船。收繳煙土。辦理既能應手。且究明中東兩路實屬一氣相生。亟應由中路而及東路。並由粵洋而及閩洋。務使兩省海面。一體肅清。不敢稍分畛域。當經臣等詳

諭喚咭喇國領事義律。繕寫夷信。多撥三板小船。分赴東  
路各洋。無論粵界閩界。但有夷船寄泊。即催令駛回虎門。  
與各躉船同繳煙土。仍嚴檄南澳鎮。率領師船。在洋堵逐。  
並帶有通事。傳諭夷人繳煙。其內港各口。責令潮州鎮道  
府縣。嚴禁蛋艇出洋。以斷夷船接濟。一面飛信知會閩省  
督撫。臣飭屬照辦。使兩省聲勢。互相聯絡。實力防堵。水陸  
交嚴。夷船既不能將鴉片銷售。又不能有水米接濟。勢難  
久泊。復經該領事義律。催令一體呈繳。即據稟報陸續來  
至虎門。查有哮喘吐船。啤叻哈船。鷓船。皆稱從南澳駛來。  
共繳鴉片一千六十七箱。又五百十一袋。復有咧船。哈噴

時船囉嘛叮吐船。皆稱從福建駛來。共繳鴉片二千四百四箱。又五十七袋。此數船原不在中路零丁等洋。躉船之內。每由外洋潛行竄越。蹤跡靡常。今亦招至虎門。與躉船一體呈繳。截至四月初六日收清。合計前後所收夷人鴉片。共一萬九千一百八十七箱。又二千一百一十九袋。數之義律原稟。應繳二萬二百八十三箱之數。更溢收一千袋有零。據該領事等會稱。委係盡數繳官。不敢絲毫餘贖。臣等於督收之際。節經飭令委員。每起盡一船。即將各層底逐一查驗。不任稍有留遺。此次收繳全清。夷人成本千餘萬金。已成虛擲。諒不敢更尋覆轍。惟現值南風司令。各

國本年貿易夷船。正應陸續到粵。計自彼國開船。尚在數月以前。未必遽知。

天朝如此嚴禁。其歷年夾帶鴉片。本已習為故常。此次來船。恐亦難免。惟一時未便即寘於法。仍須責令一併繳官。臣等現又嚴諭該領事義律。將新來載貨夷船。隨到隨查。如無鴉片。即具保結請驗。僅有夾帶。即行首繳免罪。如敢朦混隱瞞。查出不許開船。驅逐回國。經奉到部行新例之後。即當擬具檄諭底稿。恭呈。

御覽。照會該國。明示限期。如屆期再有帶來。應遵照大清律例所載。化外人有犯。並依律科斷之語。與華民同照新



例一體治罪。貨物沒官。始可杜其嘗試之念。臣等又思華夷雖有分界。而海道處處可通。即如閩省各洋。南與粵界相連。北即距粵甚遠。是否尚有夷船在彼游奕。粵省無從知悉。除再飛移閩省督撫臣。一併乘機查辦外。尚恐夾帶鴉片之奸夷。慮及到粵勒繳。或從外洋徑竄。迤北各省。寄碇售私。前數年本已有此情形。此後尤不能不慮。應請敕下沿海各省。一體嚴查。時加防範。若收繳之令。隨在得行。即竄越之跡。亦永遠可杜矣。

林則徐。鄧廷楨。又奏。臣林則徐。前諭夷人出具甘結。聲明嗣後來船。永不敢夾帶鴉片。如有帶來。一經查出。人即正

法。貨盡沒官。旋據啖咭喇領事義律稟稱本國在

天朝貿易恭蒙

大皇帝懷柔。歷有二百餘年。仰賴先教。示以禁令森嚴。惟本國地方較遠。或可姑寬期限。自開船後。凡在印度之港脚屬地者。給予五月為限。啖國本地者。給予十月為限。然後即以新例遵行。則各人無不悉知。現有此例。僅有來粵者。自必遵行也。又云。凡有諭令之處。遠職自應發遞回國。以俾本國大臣呈上國主閱覽。自可明知也。等語。覈其稟詞。尚屬恭順。惟甘結仍遷延未具。近日復經諭催。又據稟稱。儘不能不取結。則啖國人船。無奈祇得回國等情。揆其用意。蓋

因該國公司散局。悉聽夷商自行經理。其中良莠不齊。且海道遑遑。設或因風沮滯逾期。即難保在路夷船。竟不稍有夾帶。一經出結。則此後奸夷。帶有鴉片。不但本犯罹於重法。即該領事亦不能置身事外。是以心切遲疑。尚非敢違法度。且查該夷來粵貿易。實係利市三倍。不惟以該國之貨。牟內地之利。並以內地之貨。牟各國之利。蓋海外島夷之國。不知名者。不啻盈千累百。因無力置船辦貨。故不能自達於

天朝。而如茶葉大黃湖絲之類。則無一國不需此物。噉咭喇等國夷商。所帶內地貨物。非獨本國自用。尤利於分售各國。

得價倍蓰。即使該夷不賣鴉片。專作正經貿易。而其所謂三倍之利者自在。以此度之。其辭不肯捨廣東馬頭。係屬實情。所云祇得回國者。不過憚於具結。強顏而出此言。未必實心如是。即使果因內地法嚴。不能帶賣鴉片。暫時躲避回國。亦於通商大局並無加損。查從前每年來船。不過數十隻。而關稅並不短絀。近年多至一百數十隻。而鴉片愈以盛行。且每船自僉商至水手。總不止於百人。合而計之。珠嫌太衆。與其多聚奸宄。孰若去莠存良。即如慣賣鴉片之噍噴噍地等。本係早經奉

旨查逐之人。除噍噴已先回國外。噍地現已驅逐。其他類此者。正

須一併嚴驅。並令出具甘結。永遠不敢再來。方為正辦。論者或恐各夷商因此裹足。殊不思利之所在。誰不爭趨。即使此國不來。彼國豈肯不至。縱或一年偶少。次年總必加多。且聞華民慣見夷商獲利之厚。莫不歆羨垂涎。以為內地民人格於定例。不准赴各國貿易。以致利藪轉歸外夷。此固市井之談。不足與言大義。然就此察看。則其不思無人經商。亦已明甚。所以鴉片之禁。不但宜禁於百姓。實可倍嚴於夷商。彼終年之間。住內地之日甚多。在該國之日轉少。非獨貪毛踐土。且皆積聚貲財。比之內地民人。受恩更重。豈有予之以樂利。而不可齊之以政刑者乎。況所來貿易

之人。不過該國之一販戶。並非貴戚達官。即鴉片亦皆私帶而來。更非受命於其國主。且自道光十四年。公司散局。一切買賣。更與其國主無干。此輩奸夷。性貪而狡。外則桀驁夸飾。內實恒怯多疑。稍縱即驕。惟嚴乃肅。查乾隆年間。粵省辦理喫夷洪任輝等控案。動即監禁一二年。無敢違抗。歷有成案可指。即近來奏辦夷案。如道光二年之命犯啡叮。六年之命犯嗎啼呢喃。皆引名例化外有犯。依律擬斷之條。處絞立決。夷人無不帖服。況鴉片之夾帶。彼本自知理短。是以臣等此次痛加訶責。亦有天良。尚非不可教誨。可否仰求

敕部將夷人帶鴉片來內地者。應照化外有犯之例。人即正法。貨物入官。議一專條。並暫時首繳免罪。如何酌予限期之處。

奏請

諭旨。通行遵辦。俾得諭令各國夷人。咸使懍遵。嗣後自必不敢犯法。似亦刑期無刑之意。

諭內閣。林則徐等奏。夷人帶鴉片煙來內地者。請照化外有犯之例。人即正法。貨物入官。議一專條。並暫時首繳免罪。如何酌予限期之處。著軍機大臣會同刑部議奏。

諭軍機大臣等。本日據林則徐等由驛馳奏。收繳鴉片煙土。有贏無絀。又另片奏。請將夷人帶鴉片煙來內地者。定例治罪等語。

該夷人違禁帶物。並暫時首繳免罪。自應專定條例。已明降諭旨。交軍機大臣會同刑部議奏矣。此次收繳煙土二萬餘箱。據林則徐等逐一查驗。不准稍有留遺。著仍遵前旨。親督銷燬。毋許別滋流弊。至本年貿易夷船。開行在數月以前。未必遽知嚴禁。此次來船。如有夾帶鴉片。亦著責令一併繳交。以絕根株。餘著照所議辦理。

林則徐又奏。臣於三月初七日。至虎門舟次。承准軍機大臣字寄。二月十六日。奉

上諭。鄧廷楨等奏。籌議虎門海口。創造木排鐵鍊。添置礮臺礮位一摺。虎門海口。為粵海中路咽喉。該督等所請。於海面安設木



排鐵鍊以羈絆夷船。並添設礮臺。添製礮位之處。是否有益。著林則徐詳細查察情形。據實具奏等因。欽此。伏查粵東中路海口。以虎門為咽喉。臣此次親至該處。督收夷人鴉片。即住在水師艇。寄碇海中。四面形勢。皆可瞭望。當經留心相度。竊見重重門戶。實屬險要天成。自零丁大洋。過龍穴而北。兩山斜峙。東曰沙角。西曰大角。由此以入內洋。是第一重門戶也。進口七里。有一山屹立中央。名曰橫檔。其前有一巨石。俗名飯籬排。又其前小山一座。曰下橫檔。海道至此。分為二支。其右一支。多有暗沙。左一支。以武山為岸。武山亦謂之南山。山前水深。洋船出入。皆由於此。此第二重門。

戶也。由橫檔再進五里。則為大虎山。其西為小虎山。再西則獅子洋。即由黃埔進省之路。是大小虎山。乃第三重門戶也。此外如蕉門。蘆灣山。三門口。新涌口等處。港汊旁出島嶼周迴。尚非夷船出入要津。姑不具論。以礮臺言之。先有橫檔南山兩處。均係康熙五十六年所建。形勢稍狹。嘉慶五年。於沙角添建礮臺一座。二十年。復就橫檔礮臺。加築月臺一座。又南山礮臺之西北。添建鎮遠礮臺一座。各安礮四十位。二十三年。又於大虎山建礮臺一座。安礮三十位。道光十年。大角山又添礮臺一座。安礮十六位。迨十四年冬間。提臣關天培到粵。適在驅逐夷人。嘍嘍出口。

之後。與前督臣盧坤商議。以大角沙角兩礮臺。中隔海面一千數百丈之遠。兩邊礮火均恐不能得力。祇宜作為望臺。遇有應行防堵之時。放礮報信。其南山鎮遠與橫檔三處礮臺。形如品字。中隔水面三百餘丈。礮火可期得力。惟南山礮臺。地勢過高。礮子易於冒過船頂。其餘原建牆垛。亦俱單薄。於道光十五年。會摺奏准。將南山礮臺前面。環築月臺。名為威遠。又將鎮遠橫檔大虎各礮臺。加築堅厚。添鑄七八千斤大礮。分別安配。並於橫檔背面山麓。及對岸蘆灣山脚。續添永安鞏固礮臺兩座。安礮四十位。二十位不等。此十五年以前。陸續添造礮臺之原委也。維時提

臣關天培即欲於橫檔山前海面較狹之處創造粗大鐵鍊安根兩岸鐵鍊之下承以木排兩端繫以錨纜有事則橫截中流無事即分披海畔如門開闔防堵益嚴以經費未充未及辦理鄧廷楨到後正與關天培商議籌辦旋於十八年夏間有啖咭喇國夷目嗎咂喻巡船三隻窺探虎門見海口布置森嚴畏懼竄去復經鄧廷楨與關天培欽遵

諭旨倍謹修防以鐵鍊木排實為阻攔夷船要具察看威遠鎮遠橫檔各礮臺之間海面較狹安設排鍊兩道足資堵截惟威遠鎮遠兩礮臺雖同在武山腳下而相距尚有里餘排

鍊既截中流。礮位尤宜聯絡。故又於威遠鎮遠中間添建大礮臺一座。安放大礮六十位。以護排鍊而壯聲威。此邵廷槓等現在奏辦之情形也。茲欽奉

諭旨。令臣詳細查察。當又移舟至武山橫檔一帶。流覽登眺。此處本係第二重門戶。最見緊嚴。其海面自西北量至東南。橫寬二百七十餘丈。至三百三十餘丈不等。所有鐵鍊兩道。西北皆安根於武山腳下。其東南則第一道安根於飯羅排之巨石。第二道安根於橫檔山腳。俱各鑿深石槽。以八千斤礮礮橫安槽底。礮身外加鐵箍四道。上扣鐵鍊四條。由四而併為二。由二而併為一。中間鈕合兩頭。貫以大鐵

鍊八條。用大鐵鎖接扣兩邊。以便開闔。其木排則以大木截齊。各長四丈五尺。合四根為一小排。穿以橫木二道。又以四小排聯成一大排。量寬一丈六尺餘寸。面底又各夾以橫木六道。箱用大小鐵箍三十口。第一道安大排三十六排。大鍊三百九丈零。第二道安大排四十四排。大鍊三百七十二丈。兩道排鍊相去約九十丈。共配鐵錨絞纜二百四十副。並設划船四隻。水兵一百二十名。管以把總二員。無事則中間常開。以通出入。如須防堵。則關閉甚速。察看木排。箍紮堅固。鐵鍊鍛淬精融。開闔亦俱得法。其新建礮臺。俯臨兩道排鍊。正成扼吭之勢。平寬六十三丈。高一

丈四尺五寸。臺牆上下。橫縱砌石。牆垛礮洞。則用三合土築成。安礮六十位。後圍石牆九十丈。高出山頂。除兵房望樓官廳。軍裝大藥兩庫。尚未竣工外。其餘均屬完整。演試銅鐵大礮。礮子均能遠及對岸山根。設有不應進口夷船。妄圖闖入。雖遇順風潮湧。駕駛如飛。一到排鍊之前。勢難統越。即謂夷船堅厚。竟能將鐵鍊衝開。而超過一層。尚有一層阻攔。就令都能闖斷。亦已羈絆多時。各臺礮火連轟。豈有不成灰燼之理。似此重重布置。均極森嚴。聞黃埔及十三行出入夷人。行舟過此。皆慄然生嚴憚心。於海防實屬有益。惟排鍊日被鹹水泡浸。加以潮汐盪搖。即木大鐵

堅亦自不能無損。若有寸鐵脫扣。一木離簞。立刻即須修復。總使聯成整片。百密不任一疏。設或連就耽延。則寸節偶乖。即全局為之鬆動。查提臣關天培於排鍊一事。久已殫精竭慮。寢食以之。而礮臺工程。亦時時躬親督造。此後歲修事宜。均須由關天培立定章程。使將備弁兵。皆諳成法。加以時常操演精熟。則海防長臻鞏固。邊釁永可潛消。堪以仰慰。

聖主虛念瀛壖之至意。

諭軍機大臣等。前因鄧廷楨等奏請於虎門海口添設礮臺礮位。創造木排鐵鍊。當降旨允准。並降旨著林則徐查看情形。據實



具奏。茲據奏稱。布置森嚴。實屬有益。惟排鍊被鹹水泡浸。日久不能無損。著鄧廷楨。關天培。隨時察看。如有寸鐵脫扣。一木離鐔。立即修復。務使聯絡鞏固。勿稍疏懈。以重海防。